

桐城耆舊傳

桐城耆舊傳卷五目錄

邑後學馬其昶通伯撰

劉評事傳第四十

左文思先生傳第四十一

姚湘潭副使傳第四十二

胡姚安吳黃州傳第四十三

左忠毅公傳第四十四

倪太僕傳第四十五

葉尚書方巡撫傳第四十六

方巡撫傳第四十七

孫鄆城傳第四十八

左侍御傳第四十九

孫侍郎傳第五十

光給事傳第五十一

劉評事傳第四十

桐城耆舊傳五

劉公諱允昌字燕及號涇水先世從豫章遷桐城是時縣人尚無有以科第世家者劉氏六傳曰劉瑩登永樂二年進士由御史出爲直隸永平知府調廣平民歌之曰太守政清二郡獲寧再傳爲劉璽正統六年舉應天鄉試第一教授敘州公其裔也生而穎異授書背文皆如素習萬厯三十二年進士選江西宜黃縣調知臨川吏能勤敏民不敢欺嘗校士應試士不下數千平第甲乙七日而畢刊落十不中一眾士謹譁於庭公出至庭執一人訊之曰某卽應聲曰女文黜者以某累然某語

致佳可續甄人冊又執一人訊之曰某曰女尚自言邪
因舉誦其疵句叱之退連執訊十餘人無差爽者眾相
顧駭散兩充鄉試同考臨川湯顯祖出其門調廣濟民
苦漕運爲條舉利弊得減半折兌轉大理寺評事未赴
任卒民追思之爲立祠公文辭贍捷學子承風自遠而
至著劉氏類山十卷四庫書存目澹然齋集共若干卷
先是嘉靖時能詩者有處士秦吾田諱嘉禾號大龍山
人兼工書法里人或求書文待詔徵明文曰子鄉有秦
吾田奈何愛野鷺而失家雞乎其詩曰彭澤稿戴先生
諱乾字元泉亦處士錢先生諱元鼎字實夫鴻臚寺丞

其詩並見 御選明詩項先生諱琳字平野爲諸生頗有聲博覽多通不涉世事其曾祖洪武閒自歙之桂溪遷桐城爲桂溪項氏至一國初有紹芳者成進士族漸盛而萬厯閒與評事同時者又有侯先生諱珦天才穎異以諸生終嘗衍蘇氏迴文詩至八百首又善投壺箸壺譜奏矢百四十法置酒張壺按譜投之飛躍疾徐各極其致云

馬其昶曰吾邑文士見於傳記者一統志唐有曹松字孟徵光化中進士授校書郎宋李公麟字伯時弟公寅字仲謨一字亮工從弟元中字冲元兄弟同時舉進士

號龍眠三李與蘇黃諸公遊好宋史公麟列文苑傳無
公寅元中而陸農師王介甫及蘇黃集於三李並有題
詠又朱載上教授黃州詩句爲子瞻所賞其子中書舍
人翊字新仲亦知名有猗覺寮雜記二卷其他無傳焉
蓋宋元以前書史所載類統稱舒州實兼今懷寧舒城
地洎明而舒南皖北之產始別之爲桐城故余書斷自
明始明時士大夫皆崇風節嫻吟詠而文罕成家至我
朝方姚之徒出桐城之文遂極盛矣評事在萬厯時
頗有文譽今所著皆佚余載於此以著其概云

左文思先生傳第四十一

左先生諱德瑋字無奇一字鏡懸父成菴諱士梓受知學使耿公楚侗以儒術教家長子德玉字元璞號茭河專尚書天啟中歲貢生先生治春秋縣中習春秋學者如方宮詹父子皆出其門當萬厯末大饑居民相剽奪先生居邑東教授縣城一日歸經祖居族人爭告飢因出館金散之立盡後一人至無金卽解所被袍予之抵家囊橐蕭然其後官逮治諸肆劫者惟左氏以得金故無一人罹法先生兩中副榜年五十二卒學校諸生聚明倫堂私謚曰文思子鉛鉞銳鑕皆賢自鉞及兩弟皆縣學生鉞字公虔獨傳其世父尚書學謹禮法銳字幼

錚旁綜子史不專家妻盛氏能通毛詩論語列女傳子
昊字白存號采一早孤內稟母訓外資叔父藏一先生
獎勸卒成其業爲學者所宗箸四書表證六經正訛然
其平生精力尤瘁於史自溫國通鑑紫陽綱目及劉恕
外編李燾長編他稗官野乘皆蒐采成讀廿一史綱十
卷讀明史綱五卷前列歷代統紀世系國都地域改元
年號諸圖考粥田宅剗厠遂落其家

馬其昶曰當明季文思先生爲鄉里欽重今縣人遂無
有知者蕭敬孚文爲傳文彰之並從其六世孫愷得見
史綱蓋據其序例實起於文思先生公虔於晉魏十六

國南北朝之始終最核漢唐宋三朝則編自幼錚宋以後缺焉兵火耗蠹無完帙白存劬學析薪負荷用集厥成亦賢矣哉

姚湘潭副使傳第四十二

姚公諱之騏字汝調父諱承虞爲葵軒長子公少督諸弟學甚嚴倦則策曰麥飯詩其忘諸麥飯云者葵軒感懷句也公與從弟汝芳先後八日生甫彌月葵軒弄以筐一道士乞食笑曰一筐中盛二進士公生六歲孤貧不能購書手寫讀之萬厯三十五年進士出李騰芳房授湘潭令李湘潭人也跡弛豪放公過辭曰此去當圖

所以報德至則李氏奴不法庭笞之曰吾於爾主誼同子弟安有父兄遠宦而子弟顧縱其家人爲不法者自是境內悚息剛以爲治民且頌且謗之洞庭多盜公請往捕或以非湘潭事不宜問公曰湖潭人之所經也可異視邪吾越境往出不意盜必成擒率健卒入賊巢執其魁還誅之公性清嚴絕苞苴民爲謠曰止飲湘潭水不污長沙泥舉卓異會疾卒年四十八兵備副使王志遠怒其倔強適過縣視其斂一無所辦室中蕭然四壁書錢穀出入及當興革事局一木篋甚固啟視則疏邑中善士姦民冊副使撫屍大慟曰咫尺有名賢我乃不

知士民聞公歿皆奔哭副使曰父老休矣顧姚侯方未
斂安所得巨棺公長身八尺某鴻臚亦脩軀年七十餘
扶杖入請以自具棺斂於是撫按羣公及士民爭致賻
累千金妻項氏謝不取卒貽書桐城以所賻金爲置田
贍遺孤而請祀之名宦縣人亦請祀鄉賢 本朝康熙
閒公孫文燮仕雲南值兵亂閒道歸過湘潭父老曰此
前朝神君孫也其庇之得脫文燮自有傳

副使諱之蘭字汝芳號芳麓似葵公子萬厯二十九年
進士授福建海澄令嘗校士適家書至左右避之笑曰
吾父無私言發書則戒以官中事不患女不明斷患太

過當默念爲生民布德次第末減眾乃歎服海澄地濱
海夷商通市太監守監其稅暴橫公爲人彊毅內敏有
方略一日有數百舟環瑯解洶洶瑯大懼舟商有曉事
者亦懼謁公公曰任眾譁勿動俟吾示出則已皆曰如
約太監以舟迎公陽緩其行謂縣尉速備舁夫百人今
夕有所調發旣乘舟至太監迎甚恭曰何以救我公曰
商怨深矣浮收十倍正稅禍不測請爲君出示罷免太
監曰善示出眾解散公曰海口去邑治遠恐令歸而眾
復逞君盍從我往乎太監曰善然上供在奈何公曰上
供有額君當爲行李慮耳太監乃出輜重竝舟至縣公

又曰官舍卑隘得無誨盜曷運至郡乎太監曰善然安
所得昇者公立召百人至卽夕發太監悔然行李已前
發卽去至郡無以棲遂倍道還福州自是惟檄取上供
如額璫不復至姦民周慶妄言呂宋產金富人張疑利
之上書請採詔使往視撫按檄縣爲疑具舟而不移文
呂宋公曰是駭外國也且呂宋卽產金請貢猶當卻之
奈何示貪外夷固請勿往不許有巨商願具舟載疑慶
公令縣倅偕往親祖於海畔旣畢以銀璫繫疑疑曰我
皇商也何辱我公笑曰若得金歸乃皇商耳姑繫之次
及慶曰疑倚汝若左右手利害其之次及巨商商曰我

何罪公曰二人不得金倘蹈海死何以報天子吾以二人付汝矣戒倖伺之勿令與夷私於是竣事還報卒無金上誅疑慶璽書褒之未幾有紅夷千人載七舶至漳乞通市撫按議不許集僚佐問之眾莫敢應公請問曰若得某者夷當去卽下檄捕某公納檄懷中曰是速颺耳密誡二幹卒往某果至致書其壻爲陳禍福紅夷竟去蓋夷此行某壻主之也其贍才明察皆此類大吏咸倚辦其能然公爲治好教化縱舍冤滯率數百人躬出入阡陌督耕稼澄邑九都田瘠爲濬渠三百丈通石馬溪潮匯於澗築下埭甃石爲門九都皆沃澄人號曰姚

浦舉循良第一以父憂歸服闋補博野令行取南京禮部主事擢郎中出知杭州都會浩穰事皆親決司理某少年恃才積憾公剛直布蜚語遂移守汀州值朝議邊警加餉公曰汀州田止萬四千餘頃輸常後何堪額外議加乃搜府庫餘積得五千金佐餉完額民以不病督餉使者特疏薦之當遷秩念母老乞終養天子許之下詔稱揚曰汀州守之蘭急公惠民廉退有讓可謂淑人君子矣其加按察司副使以榮其歸天啟元年入覲京師前坐調任布蜚語司理某者亦以行取至急謁公請罪公笑謝之更揚其善人服其長者年六十三卒祀鄉

賢海澄汀州杭州名宦而民間又多爲專祠子孫棐自有傳

馬其昶曰二公之從政清操感物才施裕如要以仁心爲質姚氏惟葵軒後爲盛白湘潭副使同時名宦其後兩公子姓成進士者半由州縣外官起家以故姚氏亦往往多循吏焉

胡姚安吳黃州傳弟四十三

胡公諱士奇字易礎萬曆二十八年舉人令黃州兼攝郡邑卓異拜姚安知府所居稱治會黔蜀交訐日夜籌備因疾乞歸道卒民歌思之祀鄉賢

吳公諱叔度字勿銘號青芝父諱仲沔隆慶時舉人推
產兄弟未幾卒兄亦撫育諸孤至於成立公以萬厯四
十四年進士授工部主事嘗權杭州之南關杭民爲鑄
權政編紀其績尋守黃州黃故劇郡公處若無事卽事
至立辦時盜起黃梅勢張甚邑令求方略公徐曰此烏
合易與耳急之則瑕者立堅矣單騎往諭果解散以性
疏闊左遷光州先是布政一介守光州公至詢父老曰
此吾族父舊治也夙多惠政今甯毋弊已革而復行者
乎僉曰宦僕爲胥吏者甚害公乃按籍深錮之豪強愁
服人稱大小吳公云再入爲工部郎以疾卒祀黃州名

宦子季鵬字子翮流寇躡江北桐城岌岌出金助繕守
順治閒辟舉福建監紀通判學者私謚文介先生有南
陔草堂集季鳳字子廷崇禎閒諸生熟於史學有慰景
園詩

馬其昶曰自州縣以上官爲治恆有二患自任喜事則
侵職之謗起委成養高則曠官之刺興故往往才幹吏
晉階至道府聲譽轉寂於前時者處勢不便而無所發
其奇也黃州常若無事卽事至立辦此真才足了事者
矣若夫科條密繁終日躁擾欲以禁姦止暴收整齊一
切之效其於圖治不以遠乎

左忠毅公傳第四十四

左公諱光斗字共之一字蒼嶼萬厯三十五年進士由中書選授浙江道御史天啟初與給事中楊公漣俱以清直敢言負重望兩人公忠一體有所舉劾必諮而後行權貴人皆凜凜畏之海內賢士皆從之遊而小人之趨利貪權勢者皆弗便也巡視中城搜獲偽官偽印以百數尋出理屯田上書言國家倚漕東南不可恃而京以東畿以南兩河以北荒原一望率數千里因條上三因十四議請一切有司首課農政興水利田野不治卽異材高等亦注考下下制曰可公乃親巡阡陌督官吏

教民種植桑麻藁秸一如江南及公去田復荒不治神宗不豫太監劉朝魏忠賢矯太子令索嘉靖中戚畹莊田公封還不啟已復奏太監陳登奪民籽粒壞屯政且請蠲十三場逋租民咸復業焉督學畿輔公名能知人而識史公可法尤奇公念天下承平久人不知兵而疆場多故每行部輒較諸生射奏開屯學又奏開武學公多諳朝廷典故畱心當世之事其才無所不通未及盡試而崔魏之難作當神宗晚節東事起北關新破天子怠荒不視朝者三十餘年公上疏謂今日之事遼安則天下安遼危則天下危皇上御朝則天下安不御朝則

天下危疏三上不省當是時大學士方從哲兵部尚書黃嘉善皆以不稱職爲公三四糾而嘉善採人言許天下募兵者自領至京師受職公論其害事寢不行初御史熊公廷弼巡撫遼東負才自喜爲言官所論去遼遼敗復起經略廷臣欲斥魏應嘉等謝之公疏救熊意不平已而熊公亦敗光宗崩李選侍居乾清宮熹宗居慈慶宮選侍者光宗所愛幸上崩選侍欲專大權矯遺命母天下聲言垂簾決事羣臣牋奏令先進乾清而後進慈慶而諸內臣劉朝魏忠賢等欲倚選侍自固皆出死力佐之於是公與都給事楊公謀恐爲他日患乃上疏

曰內廷之有乾清宮猶外廷之有皇極殿惟皇帝御天
居之皇后配天得其居之今大行皇帝賓天選侍李氏
儼居正宮而殿下乃居慈慶不得守几筵典制乖舛且
聞李氏侍先皇無雞鳴脫簪之德待殿下又無撫摩養
育之功此豈可託聖躬者乞令移置別殿俾殿下得守
喪次成大禮疏上選侍大怒將加嚴譴數遣中使宣召
公公曰我天子法官也非天子召不赴選侍益怒而熹
宗得公疏心以爲善楊公漣等亦力爭內臣王安亦主
二人議選侍不得已乃出居嗽鸞宮由是朝野並稱楊
左選侍既移嗽鸞宮帝所以奉養之者備具而宮奴劉

遜等盜寶漏洩恐誅詞連選侍父則妄言選侍投繯皇
八妹入井以熒惑朝士公復奏移宮以後固當存大體
寬小過御史賈繼春上書以移宮非是首排公其黨相
繼譁於朝帝乃宣諭百官備述選侍凌虐聖母諸狀繼
春得罪去浮議始息其後崔魏猶借三案以殺諸臣三
案者此其一也大學士沈淮與外戚鄭養性太監劉朝
交通亂政先後典重兵公與刑部尚書王紀等先後論
姦相典兵外戚典兵內監典兵必爲國患居無何此三
人者皆敗而魏忠賢新專國命廷臣三案異議者皆附
之其黨崔呈秀魏廣微尤用事公已歷官至僉都御史

而楊公爲副都御史是時吏部尚書趙公南星侍郎陳公於廷左都御史高公攀龍吏部都給事魏公大中皆負海內清望羣小畏忌之公同郡阮大鍼者謁忠賢進百官圖曰某宜先驅某宜後擊某宜正攻某宜旁射忠賢大喜按圖殺諸君子往往多用大鍼之策崔呈秀初巡按淮揚賅累巨萬高公攀龍劾之遂父事忠賢魏公大中亦劾大學士魏廣微於是崔魏教忠賢速殺楊左諸人事未發會楊公奏忠賢二十四罪忠賢大怒公復草疏論忠賢及廣微罪三十二可斬疏未及上忠賢詞知怒甚欲殺之未得當乃先二日罷兩人官而逐之廣

微嗾忠賢劫公裝以逮忠賢不應已而覘公就道惟襍被而已廣微私自喜曰幸未劫也先是給事中傅樾與東廠理刑傅繼教結爲兄弟因繼教通於忠賢樾欲殺公等以媚忠賢乃曰左氏客有汪文言者並游楊魏之門今鍛鍊文言爲納賄則諸人可殺也遂上書論之公奏辨數四乞罷歸養親不許忠賢既急欲殺楊左兩人未得乃先令兩人罷歸而中朝拷掠文言文言不服遂殺之御史徐大化者忠賢黨也論楊左妄議移宮且受熊廷弼賄誤封疆又受屯吏金故事御史巡視屯田屯吏餽金數百御史受之以爲常公獨卻不受諸御史皆

慙且恚至是大化誣奏之忠賢矯旨逮楊左入京考鞫
緹騎至桐城家人環泣生祭檻車出郭父老擁馬首號
泣壯士數百人潛行欲伏闕訟冤行至黃河公知之固
辭謝乃還容城孫鍾元先生欲脫公於客氏以告公公
曰吾雖不肯豈能求生於媚人之手乎至則下詔獄許
顯純者素無賴尤疾惡士大夫謁忠賢求爲獄吏入獄
者多不得免至是嚴刑訊公坐贓二萬金是時熊廷弼
亦兵敗下獄爲狀告於朝曰楊左兩人乃皆前日劾我
者也何以余爲通賄而畿輔好義者皆設部分募應鹿
太公鹿太公者太常卿鹿善繼父也太公爲人好氣樂

義日夜醵金爲左公償賅初公視學畿輔畿輔人德之
故爭應太公金入未畢而忠賢已殺公於獄是歲天啟
五年七月二十四日也卒之夜長虹亘天里中星隕如
斗而楊公漣魏公大中皆死閱二年烈皇帝嗣立誅魏
忠賢客氏崔呈秀而褫阮大鍼魏廣微職贈公右副都
御史賜祭葬再贈太子少保諡忠毅予三代誥命建專
祠並祀鄉賢祠初大興人史公可法幼貧賤公爲督學
史以童子試見公公奇之曰子異人也他日名位在吾
上因召之讀書而時時餽遺其父母一日夜歸風寒雨
雪見史隱几寐解衣覆之勿令覺其憐愛之如此及公

逮繫史已舉於鄉矣知事不可爲乃衣青衣佯爲家奴
納橐餖者賄獄卒而入見公肢體已裂抱而泣乃飯公
公呼而字之曰道鄰宜厚自愛異日望子爲國柱石今
子殉經經之小節而攫姦人之鋒我死子必隨之是再
戮我也史拜且泣解帶束公之腰而出數日公死遺骸
潰爛識其帶乃棺而斂之其後史果以功名顯世所謂
閣部史忠正公者也而公諸子亦皆有文章節義自有
傳

馬其昶曰吾鄉戴田有先生有逸才喜前朝軼事以史
筆自詭嘗記薛大觀及一壺先生畫網巾者信乎其辭

之能也戴以文字得罪死其書世不恆有左忠毅公傳最其少作余取其文爲要刪而存之

倪太僕傳第四十五

倪公諱應眷字申之號吉旋始祖元末由浙江遷居舒城其後復遷桐城九傳至公舉萬厯三十五年進士授上杭令地產毒草挾怨者輒食之以詐取財物公令罪人掘草以贖草遂絕擢監察御史萬厯末孝端皇后薨疏稱母儀曠邈宜慎積漸無致大柄旁落時訝其語激及光宗宅翼室貴妃請封皇后乃服其先見光宗崩疏引春秋許世子不嘗藥以討正紅丸之罪熹宗新立上

言皇上冲齡嗣服情識初開必慎選內侍定職掌擇老成端正有氣節者日侍左右知飢渴察寒暑愼起居遠聲色於大禮竣後選經明行修有道術者宏開經筵以廣論思又反覆論勤政納諫謹微諸端累數百言李選侍之移宮也羣議鼎沸公獨疏陳仁義宜兼盡楊漣去國復抗疏請畱一時推爲敢言晉太僕少卿瑞禍起削奪歸崇禎初累遷至南太僕正卿年八十卒贈工部侍郎祀鄉賢子祚善字永錫崇禎中以明經授永興令遷岳州通判金華同知值許都倡亂首犯金華登陴設守縛斬郡內姦民數十賊駭退以功擢處州知府其初蒞

永永治至岳而永破蒞岳岳治至金而岳破故永人岳人皆立去思之碑元善字資生副貢生戶部司務嘉善字受之天啟二年進士改庶吉士授簡討以太僕忤璫削奪遂乞假歸崇禎初起官歷中允右諭德諭德次子田玉字度如爲休甯教諭設義塾葺學宮多求遺書及古禮樂器與諸生講習其中資其膏火祀休甯遺教祠馬其昶曰公在朝侃侃可謂忠矣其初仕上杭上杭民爲生立祠越十餘年倭寇來犯戒勿毀其居鄉年八十里父老祝之爲鐫仁壽碑東郭外其入民如此此豈能虛致者哉

葉尙書方巡撫傳第四十六

葉公諱燦字以冲號曾城其先永樂時自婺源來遷營宅兆項家河桐城之葉有峽山陶冲樅鎮葉家河之別而人文獨推項河六世諱奕廩生公祖父也有厚德嘗得罪鄉貴人弟交走京師直其事交子維蕃號實齋儀徵訓導以行德惠落其家捐地宜民門內祀唐邑尉張孚卿公再從父也父諱應和廩生公少時家貧塾師教以進取文不習潛誦莊子及舉於鄉課徒自贍經其指授悉有繩尺萬厯四十一年進士官翰林院編修校書秘閣多所濡染四十七年會試同考遷國子司業士習

浮競爲開示名理進以古學復召入充講官魏闡用事
遂落籍歸築室嶗峒峰下若將終焉當天啟中婦寺亂
政吾鄉縉紳仕朝列者類以伉直被禍於時公與方公
赤城亦岌岌幾不免崇禎初起掌院事教習庶吉士轉
南京吏部侍郎晉禮部尙書鳳陵工成奉命越江告祭
以病請休公記誦不過人穎悟獨絕潛心理道充然有
以自樂好蓄書家藏數萬卷皆手自讐勘裝潢大帙聞
異本必購致之既致政纍書若城坐臥其中崇禎初里
中盜起至公宅無所得惟牙籤充棟而已箸讀書堂稿
八卷天柱集南中稿廡下草若干卷年七十八卒南渡

後賜諡文莊子士璋以父廕至戶部郎中士瑛崇禎七年進士早卒立孫諦昌雍正時舉人初公與方赤城最善兩人微時日相聚茅屋中按膝密語期許甚高後兩人官位相埒而俱以清節顯

方公諱大任字思仁號赤城早歲不偶萬厯四十五年六十五始成進士除北直元城縣令擢拜御史監理昭陵過西山見魏忠賢營生曠踰制抗疏糾之忠賢怒欲加罪賴輔臣韓爌曲救得免再疏請致仕乃克歸忠賢恨不已天啟五年輔臣馮銓阿忠賢旨嗾御史王炯誣奏坐贓千金下撫按提問會王恭厥災廷議恤刑擬

城旦踰年崇禎改元詔自配所復原官年七十四矣當
逆璫未甚時公發其姦最早疏稱臣高祖給事中方向
曾劾巨璫陳祖生於孝宗之朝臣從曾祖方克曾劾巨
璫邱得於世宗之朝臣爲國擊姦實不敢容默爲家世
羞於是朝野傾矚再起復官晉僉都御史巡山海關故
事按部但巡關內公獨出關千餘里與總督袁崇煥經
畫方略再晉副都御史巡撫順天出守通州城賴以全
一子甫數齡邏者得其家書無一語私上聞嗟歎久之
闡解遂得疾請告歸里公性清峻官至開府家無千金
之資箸有霞起樓集

馬其昶曰文莊讀書堂稿在其裔孫處後爲葉挺生吏部所得吏部有弟在蜀往余入都從吏部詢之則已寄蜀矣縣書載公理學傳不能言其詳意其藏書多性喜博覽其遺稿必淵懿可觀也方氏累世御史著聲魏闕初熾自周宗建一疏外未有指名斥之者副憲晚達首折巨姦雖由忠悃抑亦家風使然哉

方巡撫傳第四十七

方公諱孔炤字潛夫號仁植廷尉大鎮子也萬厯四十四年進士除嘉定州知州調福甯州入爲兵部主事天啟初廷尉方爲御史與鄒忠介高忠憲顧端文諸公講

學首善書院天下欣然望治於時公亦歷官員外擢職方司郎中未幾而逆閹用事諸賢相次罷邊事棘樞曹選帥率通賄得規避公疏劾之魏忠賢欲進封兄子良卿伯爵公執不可忠賢怒削籍歸崇禎改元起職方郎中遷尙寶卿丁廷尉憂廬墓三年縣民倡變率鄉人討平之時流賊倂擾楚豫因益議廣儲積備器械爲固圉計城賴以全服除補原官尋以僉都御史巡撫湖廣始蒞任賊已由鄖陽渡河公所部號萬人備多力分騎兵不及十一擊賊李萬慶等於承天八戰皆捷時總理熊文燦主撫議納張獻忠降於穀城授副將嗣是詐言求

撫者踵至公力爭撫賊之誤條上八議格不行踰年乃有分地撫馭之命公嚴備遏賊南下未幾獻忠復叛知有備引而西又遏賊荆門當陽有來家河神通堡之捷獻陵竟得保已而賊屯興山楊嗣昌檄楚川沅三師夾攻賊宵遁公知賊狡謀下令楚軍將止屯勿進而楚軍二將已迫嗣昌檄違節制深入至香油坪賊果大集楚師援絕遂潰先是嗣昌檄楚將進兵又調公駐襄陽相距八百里及聞楚師敗約沅川二師赴援二師嗣昌又檄調他去公乃獨率麾下千餘人疾馳抵竹山而楚師已前潰六日於是公至亦被圍嗣昌之代文燦也亦專

主撫而公主劓異議至是遂劾公失機逮下獄長子以
智嚙血濡疏訟冤得減罪遣戍紹興久之用薦復官命
督山東軍務未行而京師陷遂奉母南奔歸隱白鹿山
前在園中與黃石齋先生論易既歸益潛心經訓箸周
易時論二十二卷尙書世論二卷詩經永論四卷禮節
論若干卷春秋竊論二卷全邊紀略十二卷撫楚疏稿
四卷環中堂集十二卷門人私謚曰貞述齊先生諱程
字遜元嘗爲公記室一時推楚撫奏簡爲谷子雲筆札
崇禎末兵賊交困每登陴東顧痛哭失聲作望南畿諸
臺官詩十篇音節楚激得風人諷刺之旨無何不食卒

年二十九又齊子安諱維程慧悟絕人寓目成誦卒年亦二十九兄維嶽詩文與之齊名惟捷敏遜之亦早卒馬其昶曰公初在職方忤璫觸禍後出撫楚與督師異議左牽右掣不隕不止嗚呼八捷之功不能當部將違制之一挫効忠亂朝才用未盡可勝慨哉

孫鄆城傳第四十八

孫公諱繼陞字我陽才識開敏萬厯中三中副榜四十年授海門訓導多所裁成因廣學額歲旱建議開石閘南關外引海水溉田禾盡甦而泛海商舶舊從五狼山入口舟往往折壞至是俱從海門閘入避峻磯急湍

明年大水泰通海三州如皋諸水由此出田廬無損商
民歌之號曰孫公閘立祠祀焉利河鎮近海隄善潰屢
濬築知縣嚴爾圭請以屬公未期月隄成大吏器異之
司訓四年凡七薦擢項城令兼攝商水涖項城時值河
水漲民飢奏發銀萬二千半振半濬河公請分振老弱
其丁壯有力者悉令日掘土傅隄計多寡給米飢濟而
工亦竣銅陽城積寇屯潁州四出劫掠大吏檄諸郡邑
協治皆莫敢動公獨請復馬快及守城民壯之食益募
練三百餘人訶知賊首出劫率精卒夜馳抵城下鳴金
鼓守賊驚矢下如雨皆伏不戰天明矢盡急攻之繼以

火城中草廬盡焚賊死亡略盡威名遠聞三年調山東
鄆城鄆爲盜藪城圯久不治姦民勾結白蓮教爲患賊
首宋尚營聚眾出沒曹濮汶壽間公先在都聘勇士馬
之龍等挾與俱旣視事明日巡城建大旗城上募夫運
土培高上加甃八尺周城濬深濠外築土垣爲重關宋
賊以六百人劫黃堆集欲因以起事公知其情乘城嚴
守遣鄉兵往援別設伏蘆子橋以待鄉兵行不三里果
遇賊因奮擊賊卻伏兵興於前夾擊之賊大挫已復連
九營十八寨沿黃河上下五百里各穴地爲窟室外築
棗樹營深厚四十里與白蓮教徐鴻儒及登曹賊爲犄

角詔河臣李若星會同壽張濟寧曹沂各守道進剿用
公策禁斷黃河船賊不得南逸大兵駐東西北三面堅
壁不戰日進數里賊益蹙未幾四十里棗樹營盡平民
大說爲立生祠勒石紀功以老疾乞休崇禎初敘前功
以員外郎徵堅臥不起鄉里休戚勇於任負與方赤城
姚心甫何芝岳戴允孚諸公結金蘭社觴詠往復卒年
八十八子隆光敦內行事孀嫂如母同時戴公諱君采
字允孚萬厯二十八年舉人令青田以惠愛爲政不樂
久吏去官歸鄉望甚美邑中汪黃之變田廬獨免焚掠
鄧公諱士美字實卿以選貢授廣東靈山令有廉愛名

年九十三子元盛諸生年八十五元炤字含甫崇禎時副榜深研經術有春秋四家宗旨年八十六元盛子森秀號樸菴年九十七文行爲當時所推世德世壽縣人無與爲比

馬其昶曰州縣令當末季其難倍蓰禍亂已蘊乘閒竊發財權兵符不己屬一搖手舉足文法吏持常格議其後非才具恢斥烏能勝其任乎鄆城習水初膺七薦契闊武略靖茲搶攘賞卒不行明之刑政其愼矣

左侍御傳第四十九

左公諱光先字述之一字羅生號三山天啟四年領鄉

薦入都會兄忠毅公構璫禍微服歸崇禎改元謁選得
福建建寧令課績最擢御史疏薦劉公宗周鄭公三俊
倪公元璐等而劾宗室朱術珣貪賊無狀當罷斥公在
臺敢言有忠毅謬謬之概巡按浙江任滿且受代忽傳
中旨募兵察其僞捕得伏誅未幾而有許都之亂許都
者金華人家豪於貲敢大言交結聲氣伺閒煽亂連破
東陽義烏浦江乘勝攻金華前所傳僞檄募兵都之黨
也公旣受代出境聞變馳還或阻之公曰賊烏合初起
乘不備擊之可破不然勢且益熾何乃忍便文自營於
是徵兵集餉素知遊擊蔣若來有將略益激厲之不十

日都窮蹙生得斬以徇亂定行抵南都大司馬史公可
法迎勞之曰浙之靖南都之福也時燕京告急公勉史
公率兵勤王既別復貽書及之已而燕京陷福王監國
公被命安撫浙江時馬士英貪定策功出史公於外再
起阮大鍼公爭之不可會許都餘黨應募再逞公與大
鍼世讐又嘗劾士英故士英大鍼誣以殺降激變祁公
世培爲具揭訟冤而大鍼必欲死之百計嗾黨交攻朱
術珣等皆起應之復坐以通賄屬吏逮之亂亟道阻閒
行走徽嶺得免鼎革後益溷跡自晦年八十卒嘗一日
坐廳事有遠使到門致書數十通布數匹公曰此必建

甯人也訊之果然時公去官十餘歲矣且在難乃踰險
千里而至後祀建甯名宦公爲人廉清居室甚整對客
亦時雜談嘲宦閩七載蕭然就道及接浙將歸故事御
史歸有謝薦儀公曰昔先兄巡屯督學皆卻餽不受今
何敢愧先兄顧念桑梓遭寇骨月故人不死於賊且死
於兵死於歲吾安能無意卒受之歸以餉親族其後里
人亦請祀鄉賢箸奏議二卷弟光明字允之號石樓崇
禎時以選貢生爲黟縣訓導遷福建武平令縣地疲瘠
軍民雜處吏從無得上考者至則革羨餘恤獄訟以字
愛得民時江廣羣盜竊發盡捐祿入爲守禦備益置社

倉振荒勸農循聲大起以兄侍御抗疏觸權姦遂謝事歸里箸十餘錄性學宗藏於家侍御子國鼎字夏子及弟國昌皆諸生國治號橘亭以附貢考授州同崇禎時又有汪參議吳主事璩侍御皆有文學而擅吏能

汪參議諱國士字君酬崇禎四年進士授福建閩縣令禁火耗免羨餘一以簡靜爲治遷揭陽課績最擢戶部主事尋由郎中除山東備兵參議值歲不登殫心輸濟民以不飢乞骸歸未幾卒父諱世澄受學羅近溪故其學有原本尤耽吟詠箸簡軒十一集子鶴齡字羽年啟齡字大年皆能詩

吳主事諱國琦字公良號雪崖年十五刲股愈父病與汪參議同歲進士令蘭溪愛民好士有玉蘭之瑞士大夫作玉蘭詠勒於石改漳州推官疏沈獄八百餘案擢兵部主事值國家多難草渡江九策皆切中時務晚歲精詩律箸尙書音易占禮略及懷茲堂水香閣等集子宏安順治九年進士翰林院庶吉士

璩侍御諱伯崑字山甫初以副貢授江西武寧令其地爲漢海昏侯封邑明初陳友諒餘裔又聚居縣西柯源洞號桀滑難治舊設銅鼓營鎮之至則平情以處頑梗馴服大盜熊化元至詣獄自首勸學課士均田賦定畫

一之則民賴其利擢御史有政略石湖集子宣諸生案
順治十四年舉人

馬其昶曰忠毅劾魏閹三十二可斬疏未及上禍作侍
御焚其稿稿不傳世爭惜之然忠毅大節固不賴有是
疏當變起卒然忠毅生死未可知且太公太母在堂嗚
乎悲夫豈得已哉許都跳梁勢窮授首南都以寧而世
猶或有異議予是以論著之

孫侍郎傳弟五十

孫公諱晉字明卿號魯山始祖福一自揚州遷居桐城
父號寄寰諱鼎祚有厚德家貧公少英峙出遇左忠毅

於道弗辟忠毅嘗夢之帝所一少年躡其後及出見其
貌類所夢少年又弗辟道奇之間持杯何爲曰買油夜
讀耳問能爲文乎曰能卽歸試以文立就因以兄子妻
之天啟五年成進士授南樂令調滑縣報最擢工科給
事中以疏劾大學士溫體仁任所私人典試事亂祖制
被謫體仁敗復起爲給諫始懷宗懲魏閹餘黨編逆案
禁錮崇禎七年會推冢宰錮者賄吏部圖翻案侍郎張
捷請臨軒奏之首逆案中唐世濟呂純如名以進羣臣
愕然公厲聲曰昔錮是則今舉非捷卽欺舉朝無人將
欺陛下何如主邪上曰科臣言是明日復上疏論之逆

黨雖憾亦以是不獲卽逞八年流寇南犯公以陵寢爲憂兵部尚書張鳳翼匿其狀且謂公南人何憂賊賊起西北不慣食稻米馬不飼江南草公奏劾鳳翼欺慢又言安慶爲陪京門戶當亟增兵防守累遷大理寺卿特疏出劉公宗周金公光宸於獄薦史公可法於吏部總兵黃得功被逮疏請釋之得出鎮鳳陽其後江左一隅竟賴史黃二公之力時賢路闕塞公在朝嶽嶽諸君子咸倚賴之推桐城左公後一人也尋以兵部侍郎出督宣大當時朝臣率輕外任必與時齟齬者乃推出之公獨曰主憂臣辱吾何敢愛身至則修斥埃嚴守備籌兵

食嘗集將佐椎牛置酒大會酒三行乃按劍起發音慷慨謂諸君何以報國乎將士無不感激思自効越二年以疾乞歸凡節餉十餘萬封識如初卽日單車歸金陵亡何京師陷馬士英擁立福藩出史公可法於外逆黨亦攀附驟用興大獄目公爲黨魁兄頤字儀之知浙江仙居縣乃倉皇奉母避讐仙居筮得遯之咸因自號餘菴又曰遯翁 國朝舉舊臣強起之不可築室龍眠山率子弟讀書其中長子中麟字振公三子中彖字易公順治十一年同舉於鄉明年中麟成進士四子中夔字臥公六子中夏字威公均有學行而臥公詩名尤著公

家居養親事兄無不備至年六十八卒學者私謚孝節先生祀鄉賢

馬其昶曰予幼聞吾縣前明有孫大司馬考之縣書所敘述皆不得要領後觀孫氏譜慨然慕其爲人公所建白動關天下大計而鄉里後進乃不能言其行事予甚惡焉於是採其大節著於篇

光給事傳弟五十一

光公諱時亨字含萬少有俊識敢決事性不能容惡崇禎七年進士初授四川榮昌縣是時流賊起陝西天下大亂榮昌之衝有石橋曰思濟縣人謀醵金修橋工費

鉅公告父老曰賊旦暮至而城圯奈何今當毀橋具舟
渡而移橋石繕城此兩便也於是募役百數十人運大
石城下中途一石墜地裂有聲鑿之得石龜色如紫玉
身隱隱有龍文若字若卦畫不可識公蓄之池中每池
中氣與雲接則天雨晴亦時有異光城成而賊至設奇
計卻之徵入京師賜對左掖門略言近事之誤莫如撫
賊賊猖而禍漫賊撫而禍深楚禍之深皖禍之深以獻
革諸賊之撫耳其誤皆惑於熊文燦之撫鄭之龍以海
與之龍可也以腹心之地與賊不可也今當布大信以
傾賊黨募民之剽悍從賊者歸而爲兵諭民之飢寒陷

賊者歸而爲農其眾可寡也當對時上爲起立注視者
三厯兵刑二科給事中旬月閒彈劾權貴及言軍國事
書凡百餘上桐城歲用兵又年比不登漕米三歲未輸
布政下檄補徵民疲病無以納公疏請免之流賊陷山
西入畿輔京師大震時詞臣李明睿倡議南遷公曰賊
四面環集乘輿將安往請固守根本定人心及城陷公
與御史王章巡城章爲賊殺公墮陴折左股匍匐入尼
菴夜半自經尼救之不死過御河與御史金鉉同投河
鉉死而人或拯公起移時甦遂潛行南還至宿遷大帥
劉澤清遣軍士執之先是阮大鍼名在逆案中左魏之

死大鉞有力焉公嘗切齒詬詈大鉞至是大鉞喉澤清
執之坐以阻南遷罪而與金壇人周鍾武燦同日殺之
周武兩人固降賊者也由是野史亦遂稱公降賊唐王
時子廷瑞字輯侯血疏訟冤給事中方士亮亦具疏辨
曰執政以阻南遷爲名蓋別無可文致使時亨有臣闖
實事則一六等案殺之有餘何必借刃阻遷哉以阻遷
殺時亨則時亨之無僞仕明甚疏上樞臣黃公道周是
其議得旨昭雪復官並授廷瑞官內閣中書初公自榮
昌召入京家人挈龜還里避亂祁門光氏之先祁門人
也一夕風雨震電龜騰空去或曰光公其不免乎及聞

公死日果符其後康熙二十六年戴編修入燕京有役事館舍者年八十餘矣自言始事桐城光給事都城破時親從御河中救給事起復拊膺歎曰豈知其送與阮馬殺乎戴爲文紀其事並述公榮昌時治蹟孫標字霞起號虛舟康熙間諸生逾六十事母猶童時澹於利榮陶然自得天趣有片觚齋集曾孫成采雍正二年進士著大易旁通十二卷

馬其昶曰公初墮陴及自經投河屢死不得卒隕命於姦人之手事旣已驗白而野史誣載至今猶被口語余閱潛虛集意編修平時持論稍苛今所記當不妄後見

桐城軼事紀被誣下獄及昭雪事甚詳左侍御光先有
野史辨誣一則而公自爲祭影文述死狀與左戴言皆
合其文載龍眠古文中余乃據以爲傳毋令蒙惡聲焉
當公之下獄也法司會訊獨御史必欲坐以阻南遷罪
殺之御史者卽初麗逆案而後首迎降之張孫振云

桐城耆舊傳卷六目錄

邑後學馬其昶通伯撰

張忠節公傳弟五十二

阮忠節公傳弟五十三

夏烈愍公傳弟五十四

孫節愍公傳弟五十五

胡監紀馬參議胡通判左沅州傳弟五十六

周方姚陳王尹趙汪筮齊許吳傳弟五十七

左武康傳弟五十八

姚職方傳弟五十九

傳六目錄

方密之先生傳弟六十

吳鑑在方叔茂劉長人王永宣傳弟六十一

蔣誰菴周農父傳弟六十二

姚休那白靖識方羽南鄧顛崖陳朗生傳弟六十三

張忠節公傳第五十二

桐城耆舊傳六

張公諱秉文字舍之號鍾陽少朗俊風格標異大父參政公許爲遠器萬厯三十八年進士授歸安知縣調徽州教授屢遷戶部郎中出守撫州政崇簡靜得士如艾千子陳大士羅文止輩皆負時望父艱服闋起湖廣荆襄道遷福建建寧兵巡道晉廣東按察使海寇李之奇自閩犯粵勢張甚巡撫退保省城命將出守以公爲監軍駐節虎頭門檄修戰艦練水師躬犯矢石海霧四起颶風作士皆殊死戰生獲之奇遷右布政使調山東左布政使十一年冬大清兵自青山口入畿輔所過輒

破無畱行放兵南下本兵楊嗣昌檄山東巡撫移濟南
兵守德州濟南空虛遺卒不及二千大兵下畿輔四
十八城遂自德州圍濟南公率吏卒募士城守而連章
告急於朝督師中官高起潛擁重兵臨清不救大將祖
寬等亦觀望於是公等分門拒守十晝夜外圍急援兵
竟不至公遺書家中曰身爲大臣當死封疆老母八旬
諸弟善事之矣明年正月城破公擐甲巷戰被箭死妻
方氏妾陳氏皆自投大明湖中事聞贈太常寺卿建特
祠國朝賜諡忠節子克倬克忭皆有高節不仕
馬其昶曰予讀惜抱軒集張公祠碑文稱公與左忠毅

公相繼成進士皆死於忠蓋故世多言吾鄉人物風節之美又謂公行在明史傳不待文而顯爲之文者以厲鄉人也因竊本斯義旁採公行事爲之傳云

阮忠節公傳第五十三

阮公諱之鈿字實甫崇禎中以明經爲江甯主簿同郡諭德劉若宰薦授穀城知縣未到官十一年春張獻忠兵敗窮蹙因襲據穀城求撫總理熊文燦許之縱其屯牧公上疏言穀城當襄陽上游今爲賊首獻忠所據名雖就撫實緣餉匱欲積粟待時伏乞陛下容臣到任相機恢復獻忠旣據穀城不肯釋兵處其眾數萬於四郊

居民驚竄公至盡心調劑民稍稍安已而賊眾漸出剽掠公執以告卽謾曰借餐耳官不給餉給餉當自止村民逃徙殆盡掠及闔闔日刃殺人又於漢沔匯處立關月權稅數千金文燦所檄監軍張大經入穀城鎮撫大經客瞽者諛獻忠干支當大貴獻忠益驕心動當是時熊文燦一意主撫閣臣楊嗣昌新得上力持文燦議而公初至穀城卽上疏曰獻忠虎距邑城其謀叵測所要求之地皆兵餉取道咽喉秦蜀交會脈絡姦民甘心效用庫藏殫虛民產被奪臣守土牧民之官至無土可守無民可收無賦可徵名曰縣令實贅員耳今廟堂之上

專主撫議臣愚妄謂剿撫二策可合言未可分言致損國威挫士氣又密報文燦勸其設備文燦不答及獻忠反謀益急公單騎往說之曰將軍始所爲甚悖今幸得爲王臣當從軍立功垂之竹帛且不見劉將軍國能乎天子手詔進官厚賚金帛將軍若有所疑慮之鈿雖不肖上書以百口保將軍待將軍以不死今將軍奈何而復懷他志邪獻忠怒乃大罵公公痛事不可爲憂憤成病題數語於壁自誓以死謂獻忠旦夕必反也而熊文燦輩方自以降獻忠爲奇勲未幾獻忠果反劫庫縱四毀城入公聞變仰藥未絕獻忠遣使索印公堅持不與

遂殺之縱火焚公署骸骨爲燼是爲十二年五月六日也後贈尚寶少卿 國朝賜諡忠節曾孫爲光字暉吉孝友敦行尤篤於先二子世忠世恩兄弟相代死已見前愛雲事中

馬其昶曰公並時有阮大鍼者籍懷甯其人世所共棄與公爲同宗公既以隻身趨危城折強暴使從其謀策獻忠流毒豈至是乎不幸言不用死史冊書之有餘榮焉先是大鍼官光祿卿斥廢終至尚書公財一縣令耳卒其所爲榮辱究何如哉

夏烈愍公傳第五十四

夏公諱統春字元夫爲諸生倜儻有幹略與兄承春偕春俱知名崇禎八年保舉賢良方正授黃陂丞嘗攝黃安黃梅二縣事皆有治狀十五年賊犯黃陂公已遷麻陽知縣未赴乃督眾拒守凡十五晝夜賊忽解去公度賊必再至時眾已罷休於家閱五日賊至公出拒戰不勝城陷復巷戰力竭被執賊欲屈之公指賊渠罵曰吾職雖小官也肯從賊反乎賊怒斷其右手卽左手指賊而罵賊又斷之復罵則斷其舌瞋目視之則更剜其目且死猶以頭觸賊僵起撲地者數賊遂支解之事聞下所司議贈卹會京師陷未果 國朝賜諡烈愍妻姚氏

副使之蘭女聞變抱子投後園池中池水淺不死從一婢一僕負公骸骨歸晝則伏巖谷夜行一日賊入山大索迫不知所之一老父前行因隨之忽不見見一石窟倉皇入少頃大風起拔一樹覆其上以是得免于鼎字象九父死時甫九歲又七年補縣學生負才跌宕不爲小謹嘗捐地建烈女祠輯節烈信實略又箸明史外紀梓峯文集

馬其昶曰予閱桐城軼事內載桂王時有吳中黃者名國瓚性伉爽習軍事以新興侯焦璉薦授南甯監紀推官後以疾歸里嘗上書言時政四端其論賢才略曰崇

禎中詔舉賢良方正當時在事諸臣頗厭薄之臣本籍
桐城兩科薦舉九人授職者二一穀城知縣阮之釧一
黃陂縣丞陞任麻陽知縣夏統春皆宣力致命克全大
節焉得謂賢才之無其人薦舉之不足用哉疏入褒納
明重科第不由是者率爲時所賤簡故中黃云然

孫節愍公傳第五十五

孫公諱臨字克咸侍郎晉弟也少孤娶方巡撫孔炤女
而師事侍郎放邁不羣書史寓目便了指趣談說呢呢
善屬辭曉聲伎吹簫度曲妻兄方密之嘗規之夷然不
屑也時寇氛初熾雲間夏瑗公陳大樽徐復菴輩共結

社講求治亂禦侮之略公見而傾心因喜談兵騎射擊刺之事無不習也亦無不自以爲能一夕酒酣感時事激發引一指然燭上自誓不滅賊者有如此指遂改字武公金壇蔡生以千觔力聞過公公出所引角弓令挽之生喘息終不彀公就取弓一引遽滿開合者數色不少動生大驚服自是常衣短衣騎生馬左右笏箠插弓矢人莫知其儒者也巡撫開府楚疆屢戰賊公每雜騎士中躍馬深入橫槊賦詩已而巡撫被讒下獄侍郎督師宣大邊事棘且請病移書戒勿妄言兵由是意稍沮益縱情聲色嘗偕方直之大雪中挾妓遊鍾山下戎服

驟馬過通衢避不及者或至顛仆未幾明帝殉社稷南渡立國姦人柄政公走雲閒與陳大樽輩謀舉兵聚米而談閒製木牛流馬能自運轉凡陳徐向所爲兵家言者公一一親習其事轉以詰兩君茫如也故兩君益心重公未數日松江破三吳兵散遂從新安下嚴瀨將往依兄台州會蘇松巡撫楊文驄募兵龍泉山中素善公以書招之遂入其軍上書唐王言關外情形甚悉授副使監文驄軍順治三年七月大兵乘勝取閩楊公入衛仙霞關公隨至浦城大兵及之自知不免拔簪與妻方氏訣曰吾義不令楊公獨死汝自爲計歸報太夫

人矣遂馳去騎問爲誰抗言我監軍副使孫某也被縛
不屈死之方氏從一老婢匿草間轉入田家聞某日有
二義士死哭曰此必吾夫與楊公也公與楊公旣同死
橫屍道旁土人因就死所合瘞之刻大樹表官爵姓氏
其上久之兄子章走閩就土人所表樹求屍得之屍已
毀不可別遂竝裹其骨歸乾隆中 賜諡節愍祀昭忠
祠箸肄雅堂集十卷新城王文簡公爲之序死時年三
十六子中礎諸生伉爽有父風祀鄉賢中岳守高不仕
箸臥游齋集曾孫建勳字介酬號邵山其才兼資文武
康熙時武進士 御前侍衛署陝西興漢鎮總兵有驍

騎集子顏字求俊號咫菴乾隆二十六年進士咫菴子起岷字孚如號岷之嘉慶十六年進士蘇州府教授爲人短身清羸音辭亮越喜藏書手自勘校有推經齋劄記

馬其昶曰縣北三十里有山曰楓香嶺其上雙忠墓在焉雙忠墓者土人呼楊孫二公葬地予嘗過而弔之楊公貴陽人文采跌宕好推轂士類與馬士英有連然卒能死義固清議所許

胡監紀馬參議胡通判左沅州傳第五十六

我朝自甲申定鼎以來其時福王猶偷息於金陵唐

桂流離於閩粵一時從行播越殉節諸臣其孤忠有足
憫者而在吾鄉可紀者凡得五人其一曰胡監紀諱如
珵字卽公號潛峯淵雅有器量大學士史公可法督師
維揚開禮賢館招致四方士辟公爲記室參畫露布封
事敘功授監紀推官 大兵破揚州督師死難公殉之
其僕胡央以軍功得守備亦赴火自焚揚人合瘞同時
死事者骸骨十一人表其墓公及其僕與焉每歲寒食
挈黍飯樽酒而弔者纍纍不絕其一爲先九世從祖諱
懋功字長卿萬厯四十三年副榜貢生淹通羣籍有高
名尤精天文象數之學著天文占驗二卷介石齋稿二

卷福王時大學士高宏圖薦授浙江杭州府通判唐王稱號尚書萬元吉薦同守吉贛有功厯擢江西道監軍僉事湖西道兵備參議順治三年秋大兵久圍贛州援兵頗集萬元吉議待水師至乃出合攻水師久屯不至九月公督師出戰遇截焚舟赴水死又一月贛州破通判胡公死之而先是七月福建監軍道副使孫武公臨亦殉難於衢州胡公諱縝字瑟若由拔貢生中崇禎十二年副榜貢生任江西臨江府推官從閤部楊廷麟守贛州其兩弟繹納與俱繹諸生納以守備協守贛南城破兄弟奮勇接戰勢窮生得不屈呼曰吾殉國難死

矣弟等可自裁兩弟皆泣曰如兄言遂共死其一曰左
沅州諱德球字球如歲貢生謁選授廣西奉議州同知
有以道遠寇賊充斥勸無之官者公毅然曰國家多事
羣思爲其易誰爲其難者挈妻孥之任尋遷湖廣沅州
知州及丙戌秋大兵下沅州觸石腦裂以死妻任氏
及一女皆死老僕侯氏曰吾非不能死顧吾死誰殯吾
主人者出囊中裝具棺斂越一歲始歸嘉慶閒祀府鄉
賢祠公之未死也老僕爲言城不可守狀公曰吾年六
十餘老矣豈以偷生愧地下兒耶先是甲申之變公子
諸生旗字天章聞烈皇帝殉社稷痛哭不食嘔血數升

死而是時桐城又有曹先生者家樅陽年二十授書山中僧舍聞之亦痛哭卽散遣其徒去終身不離僧舍距其家數里未嘗一歸也人不知其名知其字曰維周爲僧種菜計其傭以食僧前後易者數十人而曹先生在僧舍種菜如故

馬其昶曰大哉 皇清之褒忠不以異代歧視也順治乾隆中屢錄明季殉節諸臣各予專諡通諡有差於是通判胡公得諡節愍其同時致命大節同而不獲上聞者猶不可勝數然觀曹先生食貧作苦數十年而見者且以爲傭也嗟乎彼求仁得仁者夫又何怨乎

周方姚陳王尹趙汪簞齊許吳傳弟五十七

嗚呼吾邑當明之季死義不屈者多矣而其事略可紀述者自胡監紀諸公外吾又得數人焉曰周日耀字磐石外兄左忠毅公被逮周獨隨檻車至京忠毅死扶其櫬歸順治元年五月間李自成破京師仰天大慟絕粒七日嘔血數升死乾隆四十二年祀忠孝祠曰方承萱字孟相以拔貢生爲休甯訓導流寇擾境大吏檄令城守城得全明年聞懷宗殉社稷慨然曰職有大小忠無崇卑古不云乎主辱臣死遂絕粒死曰姚孫極其父曰姚之章有厚德朔望集鄉人爲講孝讓不肖者多改行

崇禎十年流賊犯桐城被害時孫極年十六矣以身翼父父死哭罵賊亦死又有姚孫林亦以不屈死曰諸生陳力字列卿父子俱被執度不能兩全謂賊曰吾父老矣請殺我以釋父賊俱殺之至死罵不絕曰諸生王夷吾字爾須見賊殺其母以頭觸地者三曰母死奚生爲奮力與賊搏被數創死曰諸生尹楷字聖木事母孝母死於賊守母屍三日不去賊復至擊賊中項賊怒矢石交下遂死曰諸生趙之葵少與方君簡友善君簡知其賢使其子逢月師事之兩人遂成刎頸交君簡以守母柩死於賊時逢月客金陵未歸也趙聞信白衣冠縋城

下往哭之發笥得絹爲之斂斂未終賊至叱曰爾何爲者曰吾爲死友斂耳賊怒殺之逢月爲並祀於家當是時又有汪阿喜者汪祐僕也本壽春人歲饑逃亡祐憐而養之三十餘年及賊至俱被執賊隨釋之喜曰我與主俱出何忍獨歸必欲拘吾主者請以我代賊不許亦不去賊擊而遣之如是者再終不去賊遂殺之曰篴光宏字宏生有介節自其父兩世皆師事方明善先生建會館孔城講學其中及賊至不屈死曰諸生齊維熊字子祥粹與賊遇勸之降不可叱之跪亦不可賊批其頰曰死耳何相辱也罵不絕口死之曰諸生許世珠字赤

斐挈妻子避亂山中苦飢乘閒下山遇賊被執且撻之
罵曰毋撻我王師旦夕至若屬不知死所矣賊殺之人
有自賊來者謂頃一儒生賊掠不從殺於道左其妻哭
曰必吾夫也疾往視之果然於是呼愴痛絕死於世珠
之旁時人哀焉曰吳晉昭字克明率鄉民團練被害妻
孫氏及子光璘皆以死殉之光璘妻李氏亦殉夫不食
死光濯妻許氏爲賊逼以不受辱罵賊死人謂其一門
五義

馬其昶曰士遭亂世遐陬窮巷之中倉卒捐其軀命者
可勝道哉彼其孤忠幽憤蹈死若飴雖無所知名豈不

浩然常存乎今取其言行有可載者具於篇非謂其人
之止於此也

左武康傳第五十八

左公諱國柱字子正一字碩人號醒園忠毅公長子忠
毅被禍公甫弱冠誓不與崔魏共生懷宗御極誅魏忠
賢隨世父抵長安具疏鳴冤忠毅得贈卹予祭葬廕一
子入監崇禎十二年中副榜貢生上疏改蔭子授浙江
武康縣知縣武康舊苦徵兌漕糧公參酌條例復三十
六圖之舊制以便里甲改官兌以省民財事竣餘米八
百石呼窮黎給之民不肯受讓公公不可以之修學宮

時年比不登武康有條編夏稅南糧南絲白糧漕運海
鹽諸役督催一時公力請歸併請改折積困用蘇泣官
二載民戴之若親戚吏憚之若師訟大者立決小者亦
有所縱舍考滿且內召會國變遂挂冠歸民畫像祀之
立去思碑祀名宦年六十二卒子六人幼子雲鳳字未
生號隘居與方靈皋侍郎爲石交侍郎誌其墓以爲名
待不與其家譜同也少好老莊以遺物自遂爲宗爲文
章要渺閑放不知所從來性高簡問疾弔喪非戚屬不
往每登城循雉堞而行不欲見衢肆中人侍郎坐南山
集被逮急其難偕赴塞上遂羈死京師平生重氣類有

人倫鑒常稱邑中胡嘉及兄子文廉其後二人學行果異於眾子文韓字秀越諸生有蘭齋詩集始居縣城忽返東鄉荷莊舊宅與劉海峯先生交最篤及卒海峯爲之傳甚悼惜焉文廉字策頑號賁趾諸生舉孝廉方正賜六品冠服初武康公與弟眠樵鶴崖霜鶴稱龍眠四傑眠樵諱國棟字子直崇禎末諸生國變後匿影江湖歷游燕秦梁楚吳越歸築抱蜀堂於三都館之側三都館當龍眠山口忠毅別業也卒年七十里人私謚和節先生鶴崖諱國林字子忠順治二年舉人選儀徵教諭遷廣東南雄推官持法平再遷河南同知未之任畱

充廣東鄉試分校官尋卒箸陵江草子之稷知任邱縣
有清名霜鶴諱國材字子厚忠毅公季子也當南渡時
馬阮用事重修三朝要典詣闕上書力爭以爲大逆營
進欺蔑君父頓翻前案公道難泯揭出眾咸稱忠毅有
子流寇圍桐城急巡撫史公檄調池陽甯安兵增戍守
城賴以全者以忠毅於史有恩而霜鶴請救之力也後
更名櫟隱居龍眠山卒年八十箸越巢文集二十卷易
學及他雜箸數十卷二子暉相

馬其昶曰以忠毅之大節聞者莫不致慕夫想慕其人
則樂道其子孫人之情也況其子孫又自有立身居官

之懿美則彌樂道之矣當流賊之擾吾縣獨得完城而室家保聚不可不知所自也

姚職方傳弟五十九

姚公諱孫棐字純甫號戊生副使弟四子崇禎十三年進士授浙江蘭谿令蘭谿素困糧運自邑漕轉至南都三易船十金而致一石公請撫按具題改折又清覈田畝絕飛寄隱匿諸弊民感之爲立生祠調東陽邑有巨室子許都者雄於訾意望非常所與遊皆當時知名陰蓄死士僞爲中宮牌劄募義勇公見文牒疑之約鄰邑爲備甫定議都已反劫宣平破義烏乘勝攻東陽東陽

故無兵械縣人皆洶懼把總某開門迎賊城陷公使主簿宋琦請師杭州而自走樓村山中集義士趙鳴皋等數千人圖恢復城中有獄囚三十六人脫械不走公子文龍陰與結十七年元旦公率義勇至城下城內囚及居民應之而主簿亦偕援兵至賊破走敘復城功擢兵部職方司主事賊再來攻皆擊卻之都窮蹙詣紹興府推官陳公子龍請撫而巡按左公光先惡其陷城並其黨三十餘人斬之宏光南渡馬阮使人持彈章示公曰左光先殺降有罪能證之將增秩公曰左公君子也寧同坐死馬阮怒誣公激變左殺降逮下廷尉會王師

南下事解乃歸隱龍眠山中築頌嘉草堂每歲迎春東
郊邑令涖止士女懽集公偕老友數輩設幕張筵於河
之中流子若孫數十人奉杖履稱兕觥爲壽麗眉皓首
被服都雅旁觀者如堵牆咸嘖嘖歎息以爲盛事公自
號瑞隱人稱瑞隱先生年六十六卒祀鄉賢箸亦園詩
集長子文烈字覲侯康熙初以舉人官雲南楚雄知府
有治蹟次文勳字集侯號丹楓順治八年拔貢生祀鄉
賢次文然自有傳次文鼐字駕侯號蟄存隨侍公東陽
有巧者何德成罪當笞奇其狀爲請得免杖且厚卹之
許都陷東陽德成與都有舊常左右之因得免難復以

計盟獄囚破賊及馬阮以激變都謀陷公獄甚急走哭
鳴父冤會事解乃奉父歸隱德成後貴爲四川提督生
平澹於榮利大臣將舉應鴻博及山林隱逸皆固辭康
熙十年大饑鬻田以振夢神付一兒明日家人報生子
矣因名曰粥郎十八年復大饑刊小揭募米使粥郎捧
簿至人家求募人爭應之以孝行得旌祀忠孝祠次
文燕字翼侯順治十八年進士知江西德安縣粥郎名
士圭雍正中以薦授河南密縣皆有蹟

馬其昶曰公初邁陽九仕宦蹇連亦不幸矣我朝開
基懸車歸隱高風碩德見推人瑞時各異也余每讀張

太傅集跋瑞隱窩手澤後述迎春東郊事輒低徊不置云

方密之先生傳第六十

方先生諱以智號曼公巡撫孔炤長子崇禎十三年進士未授官而巡撫爲楊嗣昌劾罷下獄先生懷血疏滕行號泣長安門外閱兩載疏無由達上尋釋巡撫而授先生翰林院檢討會李自成破潼關先生自請効力行閒范公景文復疏薦之召對德政殿語中機要上撫几稱善以忤執政意不果用俄京師陷先生哭臨殯宮渠華門被執加刑毒至兩髀骨見不屈賊敗南奔值馬阮

亂政修怨欲殺之遂流離嶺表自作序篇上述祖德下表隱志變姓名賣藥市中順治三年桂王稱號肇慶以與推戴功擢右中允扈王幸梧州擢侍講學士明年拜禮部侍郎東閣大學士旋罷相固稱疾屢詔不起嘗曰吾歸則負君出則有親吾其緇乎未幾就縶平樂其帥欲降之令冠服置左白刃置右惟所擇先生辭左受右帥更加敬禮解其縛始聽爲僧先生既隱於禪名曰宏智居浮山稱愚者在天界爲無可入匡廬爲五老在壽昌爲墨立爲藥地又合浮山匡廬而號曰浮廬康熙十年冬赴吉安拜文信國墓行次萬安歿學者稱文忠先

生先生之閉關高座寺也友人錢飲光亦客金陵遇故中官爲僧者以錢桐城人問曰君鄉有方以智者識之乎曰吾友也君豈曾識邪曰非也昔侍先皇一日朝罷上忽長歎曰求忠臣必於孝子如是者再某跪請故上曰早御經筵有講官某其父巡撫河南失機問大辟某薰衣飾容止如常時不孝如此能忠乎朕聞新進士方以智其父孔炤亦失機繫獄以智日持疏求救諸達官此亦人子也言訖復歎未幾釋孔炤而辟河南巡撫外廷亦知其故乎飲光以告先生先生聞之伏地哭失聲蓋先生在懷宗時未及柄用其見知已如此先生生有

異稟年十五羣經子史略能背誦博涉多奇所與遊皆
四方豪俊凡天人禮樂律數聲音文字書畫醫藥下逮
琴劍技勇無不析其旨趣著書數十萬言名流海外方
氏自先生曾祖明善爲純儒其後廷尉中丞篤守前矩
至先生乃一變爲宏通賅博其三子中德中通中履並
傳父業於是方氏復以淹雅之學世其家矣先生所著
書曰易餘二卷切韻聲源一卷通雅五十二卷物理小
識十二卷藥地炮莊九卷諸子嬌瘡若干卷幾表若干
卷浮山前後集二十二卷前後編十六卷弟其義字直
之號次公好俠工爲詩力能挽五百斤弓嘗客黃靖南

侯所較射連發皆中的侯大驚國變後以悲憤年三十
一遽卒次公子中發字有懷縣學生隱居白鹿山莊五
十年不近城市年八十三卒

馬其昶曰通雅物理小識諸書 文淵閣皆箸錄提要
稱其援據奧博明一代考據之書罕與竝而山陽汪文
端公亦嘗語徐六襄先生浮山愚者學博而精其所箸
書實開 本朝經師門徑嗟乎先生躬豪傑之才遭逢
季運以佔畢稱豈其志哉

吳鑑在方叔茂劉長人王永宣傳弟六十一

吳公諱德操字鑑在號鳧客諸生才氣踔弛與從叔道

凝以詩文相矜尚明末渡江選過江詩略嘗北走燕趙
憤國步多艱慷慨談用世籌策漳浦黃忠端公薦授福
建長汀令桂王時擢監察御史時劉承允擅國挾桂王
之武岡公與給事中萬六吉力主畱駐全州之議會承
允矯王命自晉公爵而封其弟承永及錦衣指揮馬吉
翔皆伯爵御史毛壽登爭之承允脅王杖壽登囚及公
與劉湘客萬六吉等並奪職旋起原官巡按廣西在臺
錚錚有西臺封事二卷久之擢大理寺丞閒關轉徙遂
卒於粵

方叔茂諱孔時郡廩生大欽子爲諸生左忠毅嘗上其

治平十二策漳浦黃公稱其切時弊肄業國學陸萬齡
請祀魏忠賢配孔子司業朱之俊以聞畱書切責之俊
卽日南歸崇禎時除台州同知又舉賢良方正皆不就
國初屢膺薦辟堅臥不出卒年八十五門人私謚介
節先生

劉長人諱元勳幼穎邁能文好孫吳兵法睥睨同輩補
縣學生會賊勢盛詔諸生習騎射史公可法拔隸麾下
攝都司乞假歸娶方公孔炤撫湖北招致以親老辭史
公檄提餉繁昌甫入城而守備徐際相亦率眾至城下
薄暮大霧城守者疑賊至誤發礮傷百餘人際相急報

言民叛請遂攻城公下城說之事得解繁昌爲立生祠
史公以憂去巡撫鄭二陽強畱之黃將軍得功旣破賊
言二陽檄公佐剿餘賊遁匿英霍山中者敘勞擢游擊
私念鄭不足與共功名辭歸及史公起淮陽巡撫特疏
薦之居憂未出 國朝定鼎巡撫兩徵皆不應隱居孔
城三十年孔城者縣北之一鎮宋爲舒州而唐拱嘗監
酒稅於此者也明末被寇市廛蕩然公結廬其地經紀
棊販殖財產通商從而居者五百餘家孔城復爲巨鎮
後嗣昌衍六世孫開尤知名

王君諱雯耀字永宣邱君諱山皆諸生有幹濟才崇禎

末流寇攻縣城危若纍卵兩人屢籌守禦策獻之當事
邑令楊公爾銘張公利民尤敬禮之萬眾喧沸得一言
立解駐防孫得勝羅九武殘虐爲民害 大清豫王遣
騎逮捕兩營兵士三千欲掠城而遯官民惶懼王君獨
以利害懾服之俾釋戈就縛斬於市晚歲勸學獎善鄉
里服其義卒年八十五先是楊公爾銘行取入都邱君
客其所時黃將軍得功方坐擅殺桐城守將張寶山被
劾君言楊公當上書白其事楊猶豫未決君又以告縣
人孫司馬光給諫于是楊公用諸君言卒具疏敘黃將
軍功天子乃任黃爲都督東南得保自邱君也 國朝

定鼎縣人念保城功祠楊張二侯並附祀王邱二君及廩生李灼府學生員胡文燦縣學生員朱汝霖職員胡來虞等十人

馬其昶曰世每患乏才天下大矣才有不見收者其在下未嘗無人也淪棄不用其所表見者微余次數公事蓋深惜之

蔣誰菴周農父傳第六十二

蔣先生諱臣初名姬允字子仰後更名而字曰一个號誰菴少通敏有名諸生中崇禎末應賢良詔至都會大學士張至發典試發策語譏諸賢良就徵者先生乃箸

書上之略曰僕江淮之賤士也尚氣誼矜廉恥遇公卿貴人未嘗折節閒頗畱意當世之務推明治亂之理數不第於有司輒飢窮困會主上有詔顯巖穴之士或以僕薦僕自以親老子獨內顧其私不足以備天子驅策而亦以事不出於當世貴臣意必陰爲沮壞則僕且無以自見故遜避不敢居有司承檄驅迫就道比至都門問大禁而後敢入得明公所爲試錄策讀之故遂未敢陛見方今主上聰明神聖御極之初虛己延伫以聽於士大夫而士大夫莫有建一籌抒一策以副上意且相與護交持祿罔上行私主上不得已稍厭其所爲而僉

壬之徒陰用以自結日夜伺臣下之短以中傷善類數
年以來凡士大夫之負才藝飭廉隅者無不以陰謀中
之引用一二軟靡柔滑憤憤者又使投匭告密之徒魚
然於國而天下之仁賢於是乎空矣人心離散海內困
窮盜賊充斥幾半天下國家養士數百年而食報乃爾
甚可痛也所賴主上神聖不終以士大夫爲可厭棄以
爲天下之廣豈無傑士率繇舊章庶幾一遇而明公之
言又如此則是天下遂已無才矣且夫薦舉而得賢猶
是士大夫之徒也古之取人也或取於屠釣或取於亡
人今稍使一二被褐懷王者參乎其閒豈遂非我族類

而惟恐驅之不速主上卽賢於堯舜豈能以獨運致太平哉不取之士大夫則所謂耳目心膂者乃別有所託其可昭之史冊乎則奈何不以汲引人材保全善類爲心也伏惟明公起家外吏致位綸扉自嘉靖以來六七十年未嘗有也天下想望丰采兩年於茲無所表見而獨以此策著聞然則明公之心路人知之矣今天下寇氛日熾吏治日偷士風日卑民窮日甚皆烏程在位七八年間所致豈有他哉媚嫉而已矣然烏程機智警敏才猷練達使移其才能爲天下國家計猶足以集事明公自視警敏練達孰與烏程無能改於其德而意欲似

之天下其謂之何明公誠能風諸有位慎其別擇其有
茂材異等者密以上聞待之不次集思廣益豈惟致治
之理則然於明公相業必且有光矣自明公欲以格繩
之而銓曹所創之格遂與詔旨悖明詔固曰守令尤屬
親民所舉務求允堪民牧不言堪佐領也果其不堪罷
歸可也以守令薦之而以佐領授無乃使詔旨不信於
天下乎且所甄敘不但以所舉爲格且以舉主爲格矣
銓曹不畏主上之詔令而畏政府之意旨士安得不止
於千里之外然則詔旨徒頒不及逾年且廢格不行矣
明公無以僕在舉中疑僕自爲僕雖無似徒步歸山上

奉老親箸書自娛猶足以垂名後世所慮者主德之弗宣而治平之無日耳草茅之人不識忌諱不敢聞其說於天子而私獻之下執事惟明公試垂聽焉先生既上書以此名重都下范公景文復薦之於朝又撰漕屯鈔足國三議倪公元璐奇其書疏請授官召對平臺策足兵裕餉累千百言天子善之退復寫所箸書以獻命授戶部司務晉主政甲申國變閒道南歸大學士史公鎮淮陽欲畱參軍務私歎曰奈何以一騶虞將五狼乎因爲策淮上軍情數事固辭歸先生性孝母怒必長跽俟解乃起箸無他技堂稿十六卷長子愚俊達有父風

周先生諱歧字農父號需菴少與方爾止密之錢飲光
吳子遠數輩友善以博雅好奇聞四方嘗取孝經更採
集曾子語佩而誦之崇禎十七年遵義知府何剛疏論
兵事因薦錢塘進士姚素允桐城諸生周歧應召入京
上書宰相言時政得失尚書馮元飈薦參宣督侍郎孫
晉軍事以功授開封府推官參陳元倩軍復以按僉事
銜贊大學士史公軍務尋謝病歸築土室龍眠箸孝經
外傳執宜集燼餘稿嘗與豫章陳士業書曰僕歸入龍
眠二百里清流翠石諷詠其閒以畢詞賦餘事排比各
體凡傳記序說可六十餘卷旣成視之猶天之南箕虛

無所用嘗見鄧徵君元錫函史一書筆力過諸作者上
編惜失在敘置學者不便攷獲今次第增損之續以本
朝可當廿一史約也下編二十篇經世士所必資自隆
慶辛未後闕如欲篇各續之第百年來天官地理之災
祥水利河漕之徒決土田賦役之繁簡兵刑之得失官
制之冗耗邊防之強弱弛飭僻在山壤無所資考又傳
聞異詞汲汲未能究也敝邑邇年民賊兩誑江以北無
尺寸乾土僕以獨子奉母流離江干向時脫稿半塵土
矣近復移家金陵得聞足下近狀去城居山中惟善貧
每與密之夜論彈指刺刺吾道偃蹇乃如是邪雖然今

者臥子高臥雲閒維斗濯足平江足下獨步宜豐密之
上下其閒僕得介而次名姓焉天下未大窮也書疏尚
可數數足下無厭蓋其爲書自喜如此子瑄字式玉年
十四補縣學生師字合萬兄弟並工書畫有文名初先
生與族人梅山諱曰赤字子縕同受知於溧陽陳百史
陳後登政府旣薦先生而梅山堅以疾辭不赴徵辟嘗
一參吳橋范文忠公幕府已而范公殉國作弔忠稗言
數十章惻愴欷歔號稱詩史

馬其昶曰崇禎八年舉賢良方正自阮忠節夏烈愍白
靖識外又有姚訓導孫森吾家桐鄉先生之璋及蔣誰

菴六人是年誰菴農父又同膺薦辟固皆一時之雋也
觀其激卬論列摘藻斐然豈不陵厲無雙哉然則謂薦
舉之不能得人吾不信也

姚休那白靖識方羽南鄧顛崖陳朗生傳弟六十三

姚先生諱康字休那原名士晉先世自婺源遷居桐城
白苓澗桐城之姚族有三曰麻谿曰苓澗曰官莊先生
苓澗姚氏也少孤母吳氏守節稍長爲諸生才雋辨逸
何文端公客禮之文端誌吳江周忠愍公墓出先生手
史家遂據爲傳文端告歸數年被召再起強與偕先生
知世不可爲題臥猿詩以諷文端因固稱疾返後復參

史忠正公幕未幾復歸得免揚州之難屏居田野作忍死錄記其家曾祖以下四世事語致悲痛所爲文代草與白爲者各半凡十餘卷其學長於史自其小時塾師授以經則寐然睡卽讀史則心開讀至數十百行無不貫綜人所略視不省獨加詳焉其論是非成敗每與人殊異爲文法太史公亦不純似取愉快己意而止崇禎時流寇起秦豫躡及楚皖先生脫身走江渚閒取閱唐書黃巢傳始末與流寇類因思所由致寇與防禦之所由失或莊或諧雜以俚言皆援唐事比論以客京師久親見諸公營私負國故痛之也又嘗評貨殖傳皆刻行

順治十年卒年七十六白先生存時史忠正公預題其葬所曰明讀書人姚康之墓門人周行恕諱孔忠事母以孝稱母嘗曰人多子而養缺吾一子養周有潔癖至不與人同巾櫛坐處無纖塵不喜與貴顯游氣陵其上然遇長者必折節禮下之師事休那先生執義甚恭喪耦鰥居十餘年無子預營棺衾自題處士碑於先兆側不以累人

白先生諱瑜字暇仲一字安石清和有識裁博聞廣記性善飲至數斗不亂語及時事默不應酒酣閒與親交徒友論前古得失悉中情竅苟措諸政而必當也崇禎

中以歲貢生舉賢才入都廷對稱旨授雲南府推官丁
艱服闋補登州尋告歸隱居大龍山中去樅陽三十里
許石塘環其下居民種杏爲業花時遠近爛漫數十里
有杏花村山下有白家灣爲先生故居宅畔有香海棠
七株因以爲號方公潛夫爲作七棠先生序亦五柳之
遺意云年六十卒學者稱靖識先生謝頤齋諱國楨字
屏石亦高士也天啟閒諸生才思煥捷值世變退居土
室吟詠自娛寫錄天文地志方伎之書盈尺許字畫楷
正晚歲篤好禪理年八十二

方先生諱鯤字羽南少爲諸生以才穎發名後益耽思

經籍謂文藝非儒者所急也會豫章葉兼山講易桐城
與之語歎其夙慧盡以授之由是其契開解筭易盪二
卷推河洛縱橫之圖以測古人制樂用兵之法往往悉
合黃石齋先生歎爲前古未有四庫書存目先生與
姚職方交最暱其諸子文烈文勳皆從受經年八十卒
學者私謚文潛先生同時童先生諱鉉遠字方平箸易
學管窺門人張廷璐爲刻行

鄧先生諱森廣字東之號顛崖崇禎閒貢生重氣誼然
諾以匡濟爲任於時人罕所推讓下筆呢呢如懸河皖
撫張公亮黃公配元重其才略競延致之晚歲隱居不

出嘗一參制府幕爲起草活百餘人不自言也子銓字
田功號栲岑順治閒貢生知唐山縣以循卓聞有集杜
詩三十六卷鄧先生同時有文譽者曰范先生諱世鑑
字子明趙先生諱相如字又漢皆天啟閒諸生好學淹
雅尚風節文藻絕麗兩人齊聲時人語曰范經趙史趙
先生崇禎四年草治平十二策阻於勢要不果上箸有
事林偶記及史略若干卷而范先生識姚尚書弱冠時
見其論事書激賞之持示人曰此異日救時才也其識
鑒如此又有王先生諱彭年字幼公世居東鄉之炭埠
早惠年十二補縣學生研窮陰陽象數兵農漕馬關塞

之故風流雅尚不爲諂譴崇禎十年流寇至縣被執得
釋妻童氏罵賊斷臂死後二年舉於鄉會國變賁志沒
子來離字以清縣學生左侍御奇其才以女妻之言行
端謹爲鄉黨所宗洪先生諱明瑞字祥卿隱居篤學自
稱有明遺民子世治高雅有父風箸孤芳自賞集二十
卷

陳先生諱昉字則生農家子負奇嗜酒喜罵人爲詩險
僻類長吉嘗讀薛包傳慕之以宅讓兄己乃鑿石構軒
顏曰石舫內祀魯仲連李太白元次山黃魯直王文成
五人平生好急人難已而絕不與通明末亂起或告寇

至時方飲酒則大罵旣被刃未殊頸血黑一寇就視曰
此陳先生也爲合其創傳以藥掖至村媼家而去其居
在樅陽市後時挂酒餅樹上往來就樹飲醉則拾敗葉
破瓷片書所得句吟數徧輒棄去晚年更架小樓石舫
之巔造長梯達石磴而上度酒食稍具卽去梯獨坐經
時不下樓自爲喪制親題銘旌曰閒翁石舫老人之柩
一日大醉卒有三子高瑜度事親皆能順志雖極貧誓
守敝廬不去高字琬次號蓉青度字官儀號曉青皆頗
工詩然父詩瑰異其子詩則清瘦父稱酒狂三子皆循
循狷謹風操特殊矣

馬其昶曰休那憤世罵譏靖識口不臧否羽南潛心易
象顛崖范趙思捷才麗石舫佯狂麴蘖皆得自免於亂
世旣明且哲以保其身斯可謂大雅君子矣